

## Siunnersuummut oqaaseqaatit

**Nalinginnaasumik oqaaseqaatit****1. Aallaqqaasiut**

## 1.1 Siunnersuutip pingaarnertut tunuliaqutai

Naalakkersuisut ilinniartitaanermut pilersaarutaanni 2024-meersumi atuarneqarsinnaavoq, ilinniartitaanermut suliaqarfimmi pingaarnertut inuiaqatigiit ilinniarsimasuunerisa qaffassarneqarnissaat pingaarnertut anguniarneqartoq aamma inuusuttut meeqqat atuarfiannik naammassinnereeraangamik ilinniakkamik aallartitsisarnissaat aalajangiisuulluinnartuusartoq.

Ilinniartitaanermut pilersaarusiame aamma atuarneqarsinnaavoq, Naalakkersuisut pingaartikkaat inuiaqatigiit peqataanissaat kikkut tamarmik periarfissallit tunniussaqaarsinnaanertik naapertorlugu pilersitseqataasinnaanerisigut.

Efterskolerneq imaluunniit fagskolini namminersortuniinneq immi ilinniarnernunngillat, ilinniarnermilli aallartitsinissamut imaluunniit inuussutissarsiummik ilinniagaqalernissamut kingornalu suliffeqalernissamut taakkua pitsaanerusumik tunngavissiiisinnaapput.

Inatsisartut 2008-mi Efterskolit pillugit inatsit (UKA2008/152) kiisalu 2012-imi Efterskolit pillugit inatsisip allanngortinneqarnera (UKA2012/96) akuersissutigivaat. Taamaalluni Efterskolit pillugit inatsisip tassaapput Efterskolit pillugit Inatsisartut inatsisaat nr. 13, 5. december 2008-meersoq Inatsisartut inatsisaat nr. 17, 3. december 2012-meersumi allanngortinneqartoq. Inatsisartut inatsisaannik allannguinnermi ilutigalugulu taaguutaa Efterskolit aamma paarlaasseqatigiittarnermut tapiissutit pillugit Inatsisartut inatsisaannut allanngortinneqarpoq. Inatsisartut inatsisaat tamatuma kingorna "efterskolimut inatsit"-mmik taagorneqartarpoq.

Efterskolimut inatsit nutarterneqartariaqartoq oqallittoqartarpoq. Tamanna peqqutigalugu Ilinniartitaanermut siusinnerusukkut Naalakkersuisoq efterskolit pillugit isumasioqatigiisitsivoq ulluni 13. aamma 14. november 2024. Efterskolit pillugit isumasioqatigiinnermi oqallinnerit nangillugit aalajangertoqarpoq, efterskolit pillugit inatsisip nutarterneqarnera immikkoortunut marlunnut avillugu suliarineqassasoq.

Nutarterinerup immikkoortuani siullermi Savalimmiuni efterskolernermut aamma Danmarkimi fagskolini namminersortuniinnermut tapiissuteqarsinnaanerit inatsisitigut tunngavinnik pilersitsinissaq siunertaavoq. Nutarterinerup immikkoortuata aappaani efterskolernermut inatsisip tamarmiusup nutarterneqarnera pineqarpoq. Inatsimmik nutarterinerup immikkoortunut marlunnut avinneratigut Savalimmiuni efterskolernermut aamma Danmarkimi fagskolini namminersortuniinnermut sukkannerusumik tapiinissamik periarfissaqartitsinerit qulakkeerneqarsinnaalissapput, tassami Inatsisartut inatsisaanik

nalinginnaasumik nutarterineq 2027-p ingerlanerani aatsaat inatsisissatut siunnersuut saqqummiunneqarsinnaalissasoq ilimagineqarmat.

Savalimmiuni efterskolinit marlunnit Namminersorlutik Oqartussat saaffigineqarsimaneri, Savalimmiuni efterskolernermi tapiisinnaanermut periarfissiinissat, efterskolernermut inatsisip allanngortinniarneqarneranut, tunngaviupput. Kalaallit Nunaanni ilaqutariinnit, meeqqamik Savalimmiuni efterskolernissaminnik kissaateqartunit, saaffigineqartarlutik ilisimatitsissutigaa. Atuartut Savalimmiunut nalinginnaasumik attuumassuteqarnertik pequtigalugu Savalimmiuni efterskolernissamik kissaateqakkajuttarput, anaanap imaluunniit ataataq Savalimmiormiuunera pequtigalugu.

UPA 2024-mi Inatsisartut UPA 2024/159 akueraat: Nunat Avannarliit Killiit Siunnersuisooqatigiiffiata kaammattuutitut aalajangersagaanik nr. 4/2023-mik Inatsisartut ilaliinissaannik siunnersuut: Nunat Avannarliit Killiit Siunnersuisooqatigiiffiata Savalimmiuni, Kalaallit Nunaanni Islandimilu naalakkersuisunut kaammattuutigaa nunani avannarlerni efterskolit akornanni suleqatigiinnerup annertusineqarnissaanut periarfissat misissoqqullugit, tassungalu ilanngullugu atuartut efterskolimiinnermut aningaasanik qinnuteqaateqarsinnaanissamut periarfissaat misissoqqullugit.”

Taamaalilluni siunnersuutip uuma UPA 2024/159-imik aalajangerneq malikkaa takuneqarsinnaavoq. Islandimi efterskolersinnaaneq massakut periarfissaanngilaq, tassami Islandimi efterskoleqanngimmat. Taamaattumik Islandimi efterskoliniq pilersitsisoqassappat Islandimi efterskolernissamik periarfissat eqqartoqqinneqarsinnaalissapput.

Efterskolit pillugit isumasioqatigiinnerup nalaani fagskolit namminersortut pillugit isumassarsiffiusumik saqqummiisoqarpoq. Fagskolit namminersortut tassaapput efterskolisuulli nerisaqarfiutigaluni atuarfusut, taamaattorli suliassatigut imaluunniit assaat atorlugit suliaqarfiunerusarnertik immikkoorutigaa taamaalillutillu atuartut atuagarsornikkut piginnaasaqarpallaanngitsunut taakkunaniinnissaq periarfissaasinnaassalluni. Fagskolit namminersortuniinnerup atuartup nammineq nuannarisaminik inuussutissarsiummik imaluunniit inuusuttut ilinniagaannik, assassorluni ilinniagaqalernissaminut imaluunniit suliffeqalernissaminut piareersarneqarnissaa siunertaraa taamaalillunilu iluatsittumik inuuneqalersinnaaneq aamma siunertaalluni.

## **2. Siunnersuummi immikkoortut pingaarnerit**

### **a) Inatsisit atuuttut**

Inatsit atuuttoq tassaavoq Efterskolit pillugit Inatsisartut inatsisaat nr. 13, 5. december 2008-meersoq, Inatsisartut inatsisaat nr. 17, 3. december 2012-imeersoq aqqutigalugu (Paarlaasseqatigiittarnermut tapiissutit) allanngortinneqartoq. Inatsisartut inatsisaannik allannguinnermi ilutigalugulu taaguutaa Efterskolit aamma paarlaasseqatigiittarnermut tapiissutit pillugit Inatsisartut inatsisaannut allanngortinneqarpoq.

Efterskolit pillugit inatsisip Kalaallit Nunaanni efterskolimiittarnerit nalimmassarpai, matumani efterskolinik aamma tapiissutinik akuersissuteqartarnermut malittarisassat ilanngullugit. Kalaallit Nunaanni efterskolinut kiisalu efterskolimiinnermut tapiissuteqartarnek pillugu Namminersorlutik Oqartussat nalunaarutaat nr. 13, 3. september 2009-meersumi tapiissutit pillugit aalajangersakkat erseqqinnerusumik atuarneqarsinnaapput.

Efterskolit pillugit inatsisip Danmarkimi efterskolimiinnermut tapiissuteqarsinnaaneq aamma paarlaasseqatigiinnermut tapiissuteqarsinnaaneq inatsisitigut tunngavissippaa kiisalu Naalakkersuisut taakkua pillugit malittarisassiuussinissaannik pisussaaffilerlugit. Danmarkimi efterskolernermut tapiissutit pillugit Namminersorlutik Oqartussat nalunaarutaat nr. 6, 4. juli 2019-meersoq aqutigalugu malittarisassiuunneqarput. Paarlaasseqatigiittarnermut tapiissutit Namminersorlutik Oqartussat paarlaasseqatigiittarnermut tapiissutaat pillugit nalunaarutaat nr. 7, 4. juli 2019-meersoq aqutigalugu malittarisassiuunneqarput.

Taamaattumik malugeqquneqarpoq pisinnaatitaaffik atuuttoq naapertorlugu Kalaallit Nunaanni aamma Danmarkimi efterskolimiinnermut taamaallaat tapiisoqarsinnaanera taamaalillunilu Danmarkimi fagskolini namminersortuniinnermut imaluunniit Savalimmiuni efterskolernermut tapiisoqarsinnaanani.

#### *Savalimmiuni efterskolimiinneq*

Namminersorlutik Oqartussat Kalaallit Nunaani aamma Danmarkimi efterskolernermut taamaallaat massakut tapiisarput. Savalimmiuni efterskolernermut tapiissutit pillugit aalajangersagaqanngilaq. Taamaattumik Savalimmiuni efterskolernermut tapiinissaq periarfissaanngilaq.

Efterskolit pillugit inatsimmi kapitel 5-imi qulequttami "Danmarkimi efterskolernermut aamma paarlaasseqatigiittarnermut tapiissutit"-mi tapiissutit atuarneqarsinnaapput. Tassunga atasumik ilisimatitsissutigineqassaaq, siusinnerusukkat Naalakkersuisup Savalimmiuni efterskolertarneq pillugu § 37 naapertorlugu apeqqummik 218/2024-mi akissummini ilisimatitsissutigimmagu, Naalakkersuisut efterskolertarneq pillugu inatsimmi aalajangersakkanik allannguiniarlutik pilersaaruteqartut, taamaalilluni Savalimmiuni efterskolernermut tapiinissamut siunissami periarfissaqalertoqassasoq.

#### *Danmarkimi fagskolit namminersortuniinneq*

Efterskolit pillugit Inatsisartut inatsisaat nr. 13, 5. december 2008-meersup akuerineqarnissaa sioqqullugu, Danmarkimi højskolernermut ukiumut 20-t missaasa tapiiffigineqarnissaanik aningaasanut inatsimmi konto aqutigalugu periarfissaqartoqarnikuuvoq, tassani ningiussat atuarfiat aamma assessorissanik atuarfinniinnerit aamma ilaatinneqarput. Periarfissaq taanna efterskolertarnermut inatsimmi 2008-mi ilaatinneqanngilaq.

Danmarkimi ningiussat atuarfii aamma assessorissanik atuarfiit inatsimmik 2015-imi allannguinnikkut fagskolinik namminersortunik taaguuteqartinneqalerput aamma danskit efterskolertarnermut inatsisaanni fagskolitut nammineertutut massakkut ilaalerlutik.

Danmarkimi fagskolinut namminersortunut inatsit tunngaviusoq tassaavoq efterskolinut aamma fagskolinut namminersortunut inatsit, taannalu efterskolit aamma fagskolit namminersortut pillugit inatsisip 12. august 2022-meersup nalunaarutaata nr. 1172-p tamanut nalunaarutigineqarneratigut kingullermik atuutilersinneqarpoq. Fagskolit namminersortut § 1 imm. 3-mi nassuiarneqarput tassaasutt atuarfiit inuusuttunik inersimasunillu atuartitsinissamik aamma pikkorissarnerni ataatsimoornissamik neqerooruteqartartut, taakkua inuuneq pillugu paasissutissiinermik, inuiannik paasissutissiinermik aamma kikkut tamat oqartussaaqataanerini pilersitsisinnaanermik pingaarnertut anguniagallit. Fagskolit namminersortut immikkuullarissutigivaat atuarnerp suliaqartitaanerit imaluunniit inuussutissarsiutinut sammisunik fageqartitsisarnerit imaluunniit taakkua akuleriitsillugit atuartitsinerit nuimasumik inissisimanerat minnerpaamillu atuartunut ataasiakkaanut piffissap atuartitsiviusup tamarmiusup pingajorarterutaa atuartitsimermi atorineqartarmat.

Kalaallit Nunaanni fagskolit namminersortut massakkorpiag pigineqanngillat.

#### b) Siunnersuut

Efterskolit pillugit Inatsisartut inatsisaanni kapitel 5-imi qulequtaq ima allanngortinneqassasoq ”Danmarkimi Savalimmiunilu efterskolimiinnermut, fagskolini namminersortuniinnermut aamma paarlaasseqatigiinnernut tapiissuteqartarnek” siunnersuutigineqarpoq. Kapitel 5-p qulequtaata taamaalilluni tapiiffigineqarsinnaasut periarfissai takuneqarsinnaalersissavai.

#### *Savalimmiuni efterskolersinnaanermik periarfissanik pilersitsineq*

Efterskolit pillugit inatsimmi § 20 allanngortinneqassasoq siunnersuutaavoq, taamaalilluni Savalimmiuni efterskolertunut tapiisinnaaneq periarfissaqalersinneqassaaq, matumani atuartut akiliutaasa ikilisinneqarnissaannut tapiineq kiisalu atuartut angalanerinit aningaasartuutit akilerneqarsinnaalissapput. Taakkua pillugit nalunaarummi malittarisassat erseqqinnerusut aalajangersarneqarumaarput.

Savalimmiuni efterskolernermut tapiisarnissamik periarfissanik pilersitsineq Efterskolit pillugit inatsimmi nalinginnaasumik oqaaseqaatinut naapertuutissaaq, tassanimi efterskolernerit atuartut ataatsimoortuni avatangiiseqartarnerini sinaakkutininik pitsaanerpaanik pilersinneqartarneri atuarneqarsinnaapput, taakkuami tamat oqartussaaqataanerinit siuarsaataasarpup, inunnik allanik aamma nunarsuarmioqataanermi innuttaaqataanermut ataqqinninnermik siuarsaataasarpup, taakkunanilu ataatsimooqatigiinneq, akissussaaffeqarneq aamma ilinniagaqatigiinnissamut iluseqarluni piareersimaneq piumasaqaatit ilagivaat. Malugeqquneqarpoq Savalimmiuni efterskolimi atualersinnaanermut periarfissaqareermat, taamaattorli atuartup angalaneranut imaluunniit atuartup akiliutaanik ikilisaalluni

tapiisinnaanermut periarfissaqarani. Savalimmiuni efterskolernermut tapiissutit inuusuttunut arlaatigut Savalimmiunut attuumassutilinnut imaluunniit pinngortitaq inuillu pillugit Savalimmiunukarusuttunut pingaartumik iluaqutaassapput.

Tapiisarnermut aaqqissuussaq annertusineqarpat Savalimmiuni efterskolernermut atuuttussanngortinneqarluni nunat akorngini attaveqaqatigiinnernut nukittorsaaqataasinnaassasoq naliliisoqarpoq. Savalimmiuni efterskolip soorlu, imarsiorneq, E-sport, eqqumiitsuliorneq il.il. neqeroorutigisinnaavai, taakkualu saniatigut fagit toqqagassat soorlu danskisut, tuluttut, matematik il.il. neqeroorutigisinnaallugit.

*Danmarkimi fagskolit namminersortuniinnissamik periarfissanik pilersitsineq*  
Efterskolit pillugit Inatsisartut inatsisaanni § 20 allanngortinneqassasoq siunnersuutigineqarpoq, taamaalluni fagskolini namminersortuniinnermut tapiisinnaaneq periarfissanngortinneqassaaq, matumani atuartup akiliutaasa ikilisinneqarsinnaaneritut tapiisinnaaneq kiisalu atuartut angalanerminni aningaasartuutaannut akiliussisinnaaneq ilanngullugit. Taakkua pillugit nalunaarummi malittarisassat erseqqinnerusut aalajangersarneqarumaarput.

Inuusuttut inuusuttut ilinniarfiinut ingerlariaqqissinnaasunngortinniarlugit fagskolit namminersortut 2015-imi pilersinneqarput. Fagskolit namminersortut tassaapput inuussutissarsiummut sammisumik nerisaqaatigaluni atuartunut 16-ilereersunut imaluunniit Danmarkimi 9. klassimik, Kalaallit Nunaanni 10. klassimik naammassinnereersunut atuarfiit. Fagskolit namminersortut tassaapput Danmarkimi ningiussat aamma assassornermik atuarfiusimasunik nangitsilluni atuarfiit, taakkua inatsisip 2015-imi allanngortinneqarnerani taaguutaat allanngortillugit fagskolit namminersortunik taaguuserneqarput.

Fagskolit namminersortut højskolinut aamma faginik atuarfinnut assingupput, taamaattorli fagini atuartitsinermi minnerpaamik pingajorarterutaannik atuartitaanissamik inatsisitigut piunasaqaatitaqarnertik allaanerussutigaat. Fagskolit namminersortut malugeqquaat malittarisassaminni Danmarkimi fagskolini namminersortuniinnissamut Namminersorlutik Oqartussat tapiinissaannut periarfissaqartinneqanngitsut.

Fagskolit namminersortut inuusuttunut kinaassutsiminnik, inuuniarnerminni imaluunniit ilikkagaqarniarnerminnik unammilligassalinnut pingaartumik sammisuupput, taamaattorli aamma atuartunut ilikkagaqarniarnermikkut poqersunut aamma sammisuullutik. Atuarfinni atuartitsinerit qanoq angusaqarusussuseqarnerit naapertorlugit sisamanut assigiinngitsumik tamarmik immikkut qaffasissusilinnut aaqqissuunneqarsinnaapput, taakkualu suliffittaarnissamut piareersarnermit ilinniagartuunngorniarnissamut siamasissuteqarput. Taakkua saniatigut inuussutissarsiutigalugu ilinniarfiusinnaasut aamma ineriartortinneqarput, soorlu atisanik ilusilersuineq, assassorneq, qarasaasiatigut isumannaallisaaneq aamma isumassuineq fagitut allarpasuillu.

Fagskolini namminersortuniinnissamut tapiisarneq Kalaallit Nunaanni inuusuttunut efterskolerusunnigitsunut periarfissatsialaassaaq, pingaartumik atuartunut atugarsornikkut poqerpallaanngitsunut imaluunniit assassornermik tunuliaqutalimmik ilinniagaqarusulluinnartunut. Fagskolini namminersortuniinnissaaq toqqassallugu periarfissaqalissaaq, inaarutaasumik misilitsinnermik imaluunniit misilitsissutitaqanngitsumik toqqaasoqarsinnaassalluni. Tamatuma efterskolertartut atuarunnaartartut ikiliartortarneri unikaallatsissinnaassagai aamma inuussutissarsiummik ilinniagaqarnermut suliffeqarfinnullu ikaarsaarnermik pilersitsisinnaassasut naliliisoqarpoq.

Inuusuttunut assassornermik inuussutissarsiuutigineqarsinnaasunik assigiinngitsunik misileraarusuttunut inuussutissarsiummik ilinniarfimmik toqqaannginnermi fagskolini namminersortuniinneq iluaqutaassaaq. Ilinniarfiit akuutitsinerusut eqaannerusumillu aaqqissugaasut takorloorneqarnerini fagskolit namminersortut pingaarutilimmik inissisimasinnaasarput, taakkuami inuusuttut pisariaqartitaannik naammassinnittarput aamma ilinniarnermut aamma/imaluunniit sulinermit ikaarsaanermik nukittorsaasarlutik.

### 3. Pisortat aningaasaqarnerinut allaffissornerullu kingunissai

Siunnersuut pisortat allaffissornerannut aningaasaqarneranulluunniit kinguneqassanngitsoq naatsorsuutigineqarpoq.

Ilisimatitsissutigineqassaaq Danmarkimi efterskolernermut nammineerluni akiligassat ikilisinneqarnissaannut tapiissutit Aningaasanut inatsimmi isertitaqarnerpaanut sapaatip akunneranut 200 kr.-ninet aalajangersarneqarnikuuneri, aningaasanut inatsimmi 500.001 kr.-nimiit qummut isertitallit aamma akunnattumik isertitalinnut sapaatip akunneranut 600 kr.-nit, 340.001-500.000 kr.-imik isertitallit aamma isertitakinnerpaanut tamakkiisumik tapiisarneq 0-340.000 kr.-inik isertitaqartartunut agguataarneqarnikuupput.

Isertitat malillugit tapiissutinik tunioraasarneq Savalimmiuni aamma fagskolini namminersortuinnermut aamma atuutissasoq naatsorsuutigineqarpoq.

Ukiut atuarfiusut kingulliit pingasut iluini kalaallit atuartut Danmarkimi efterskolertut amerlassusaat 233-t aamma 256-it akornanniittarput. Isertitaqartut agguataarneqarneri ataasiakkaat kisitsisit allattorsimaffianni ataaniittumi takuneqarsinnaapput.

| Ukioq<br>atuarfiusoq/nammineq<br>akiliutissanik<br>ikilitsisineq | 200 kr.    | 600 kr.   | 0 kr.-inut.  | Amerlassutsit<br>katillugit |
|------------------------------------------------------------------|------------|-----------|--------------|-----------------------------|
| 2022/2023                                                        | 115 (48 %) | 50 (21 %) | 75* ( 31%)   | <b>240 (100%)</b>           |
| 2023/2024                                                        | 119 (51 %) | 34 (15 %) | 80** (34 %)  | <b>233 (100%)</b>           |
| 2024/2025                                                        | 125 (49 %) | 57 (22 %) | 74*** (29 %) | <b>256 (100%)</b>           |

\* Uani 2-nik qatanngutigiinnut akikilliliineq

\*\* Uani 8-nik qatanngutiginnut akikilliliineq

\*\*\* Uani 7-nik qatanngutiginnut akikilliliineq

Kisitsisit allattorsimaffianni takuneqarsinnaavoq isertitaqarnerit atuartuutaat amerlanerpaasartut. Eqimattat tulluuttut tassaapput isertitakinnerpaanik isertitallit, atuartullu akunnattumik isertitalinneersut ikinnerullutik.

Savalimmiuni efterskolit marluk massakkut pigineqarput, soorlu aamma Kalaallit Nunaanni taamaattoq. Taamaattumik Savalimmiuni efterskolini qassit tiguneqarsinnaaneri killeqarpoq.

Danmarkimi Ilinniartitaanermut ministeriaqarfiup ataani Ilinniartitaanermut Pitsaassutsimullu Aqutsisoqarfimmi kisitsisit takutippaat ukiumi atuarfiusumi 2023/2024-mi atuartut efterskolini aallartittut 28.400-it missaaniissimasut. Piffissami tassani fagskolini namminersortuni atuartut 700-it missaanniipput. Tassa imaappoq Danmarkimi fagskolini namminersortuni atuartut efterskolimi atuartunut sanilliunnerini ima amerlassuseqarsimasut  $(28.400/700)$  41-uusarput (40,5). Kisitsit agguaqatigiisillugu atorineqarpat, Kalaallit Nunaannit fagskolini namminersortuni atuarusullutik atuartut  $(250/41)$  arfiniliussangatinneqarput.

Aningaasanut inatsimmi konto pingaarnep 40.10.12 Efterskolit ataani Danmarkimi efterskolini atuartut ukiumut 250-iunissaat naatsorsuutigineqartarput. Danmarkimi, Savalimmiuni efterskolinut imaluunniit fagskolini namminersortituniinnissamut atuartut amerlassusaasa amerlinissaat ilimagineqanngitsoq naliliisoqarpoq. Atuartut Savalimmiuni efterskolerusuttut imaluunniit fagskolini namminersortuniikkusuttut Danmarkimi efterskolernissaminnik siumoortumik eqqarsaatersoreersimanissaat nalilerneqarput. Danmarkimi efterskoleriartussat aamma fagskolini namminersortuniittussat kiisalu Savalimmiuni efterskolertussat katillugit ukiumut 250-iussassasut taamaattumik naliliisoqarpoq.

Namminersorlutik Oqartussat aningaasartuutaat pissutsinik arlalinnik peqquteqartarput. Siullertut tapiissutinik tiguisinnaasut amerlassusaat. Aappaattut atuartuteqarnerup akii. Pingajuattut allanit qanoq tapiisoqarsinnaanersoq. Taakkua saniatigut atuartup nammineq qanoq akiliitigisarnissaa apeqqutaasarpog. Taamaalluni atuartuunermut aki, allamit tapiissutit aamma atuartup nammineq akiliisinnaanera ilanngareerlugit Namminersorlutik Oqartussat atuartut qassinik akiliuteqassanersoq naatsorsorsinnaalertarpai.

Siunnersuut inuusuttut Danmarkimi Savalimmiunilu efterskolernissaannut kiisalu fagskolini namminersortuniinnissaannut amerlanerusunik tapiissutinik kinguneqassangatinneqanngilaq. Inuit Savalimmiuni efterskoleriarusuttut imaluunniit fagskolini namminersortuniikkusuttut Danmarkimi efterskolerusussimasinnaareersimassasut nalilerneqarput.

Siunnersuut aamma atuartumut ataatsimut aningaasartuuteqarnerunermik kinguneqassanganinneqanngilaq, tassami Namminersorlutik Oqartussat Savalimmiuni efterskolimiinnermut aamma fagskolimi namminersortumiinnermut aningaasartuutaat Danmarkimi efterskolernermut tapiissutinit amerlanerusussaannngillat. Savalimmiuni efterskolernermut aki ukiumut 45.000 kr.-iuvoq. Tamanna Danmarkimi efterskolernermut agguaqatigiissillugu akimut ikinnerungaatsiarpoq, taakkununnigami aki 124.000 kr.-iugami. Danmarkimi efterskolernermut isertitat aallaavigalugit naalagaaffik tapiisarpoq. Naalagaaffimmit tapit akii qanoq isertitaqartigineq apeqqutaatillugu 65.000 kr. aamma 96.000 kr.-nit akornaniittarput. Fagskolini namminersortuniinneq agguaqatigiissillugu ukiumut 80.000 kr.-nik akeqarpoq.

Nammineq akiliutissat Danmarkimi efterskolimiinnermi malittarisassat assigissagai naatsorsuutigineqarpoq. Tamanna nalunaarusiornikkut aaqqiivigineqarumaarpoq.

Ataatsimut isigalugu siunnersuut Namminersorlutik Oqartussanut aningaasartuuteqarnerunermik kinguneqassanganinneqanngilaq.

#### **4. Inuussutissarsiortunut aningaasaqarnikkut allaffissornikkullu kingunerisassat**

Siunnersuut aningaasaqarnikkut imaluunniit allaffissornikkut inuussutissarsiortunut sunniuteqassanganinneqanngilaq.

#### **5. Avatangiisinut, pinngortitamut inuillu peqqissusaannut kingunerisassat**

Siunnersuut avatangiisinut, pinngortitamut imaluunniit inuit peqqissusiannut sunniuteqassasoq naatsorsuutigineqanngilaq.

#### **6. Innuttaasunut kingunerisassat**

Siunnersuut innuttaasunut, tassa inuusuttunut Savalimmiuni efterskoleriarnissaminnut imaluunniit Danmarkimi fagskolimut namminersortumiinnerminnut tapiiffigineqarnissaminnut siusinnerusukkut periarfissaqarsimanngitsunut, pitsaasumik kinguneqassanganinneqarpoq.

#### **7. Kingunerisassat pingaarnerit allat**

Siunnersuut allanik annerusunik kinguneqassanganinneqanngilaq.

#### **8. Pisortanik aamma kattuffinnik il.il. tusarniaaneq**

Siunnersuut 2. juni. - 30. juni 2025-mut tusarniutigineqarpoq ukunani tusarniaaffigineqartuni:

SIK

Kalaallit Sulisitsisut/Grønlands Erhverv

NUSUKA

Avannaata Kommunia

Kommune Qeqertalik



Qeqqata Kommunia  
Kommuneqarfik Sermersooq  
Kommune Kujalleq  
Foreningen af frie fagskoler  
Efterskoleforeningen  
Maniitsup Efterskolia  
Villads Villadsenip efterskolia

Taassuma saniatigut siunnersuut Naalakkersuisut tusarniaanerminni nittartagaat aqutigalugu piffissami tassani pissarsiarineqarsinnaavoq.

Tusarniaanermi allakkiamut tunngatillugu ilanngussaq 2-mut innersuussisoqassaaq.

## **Aalajangersakkanut ataasiakkaanut oqaaseqaatit**

### *§ 1-imut*

#### Nr. 1-imut

Inatsisartut inatsisaata massakkut atuuttup taaguutaa erseqqissarneqarpoq, taamaalilluni efterskolernermut aamma atuarfiit ilaanni najugaqarnermut kiisalu paarlaasseqatigiilluni nunami allamiinnermut tapiissuteqartarneq pillugit tapiissutit inatsisartut inatsisaanni allassimasut atuarneqarsinnaapput.

#### Nr. 2-mut

Danmarkimi efterskolernerup aamma paarlaasseqatigiinnermut tapiissutit saniatigut Savalimmiuni efterskolernernut aamma fagskolini namminersortuniinnermut tapiissutit kapitalip qulequtaani erseqqissaavigineqarput.

#### Nr. 3-mut

Aalajangersagaq immikkoortoq 1-mi erseqqissarneqarpoq; Naalakkersuisut, Danmarkimi efterskolernermut tapiisarnermik saniatigut, Savalimmiuni efterskolernernut aamma Danmarkimi fagskolini namminersortuniinnermut massakkut aamma tapiisinnaasut. Aalajangersagaq immiini imarisamigut § 20 imm. 1-mut sanilliullugu allanngortinneqanngilaq, taamaattorli Naalakkersuisut Savalimmiuni efterskolernernut aamma Danmarkimi fagskolini namminersortumiinnermut tapiissutunik taamaattunik aalajangersagassiornissaannik peqqusineq eqqaassanngikkaanni.

Immikkoortoq 2-mi aalajangersagaq inatsimmi aalajangersaaneruvoq, taassuma Naalakkersuisut tapiissutunik akuersinermut malittarisassiuussinissaannik peqquai, matumani tapiissutunik pissarsisinnaanermut malittarisassat, tapiissutit qanoq amerlatigineri, isertitat malillugit nalimmassaaratarsinnaanerit, qinnuteqartariaaseq kiisalu naammagittaalliorsinnaaneq. Aalajangersagaq immiini imarisamigut § 20, imm. 2-mut sanilliullugu allanngortinneqanngilaq, taamaattorli Naalakkersuisut Savalimmiuni efterskolernernut aamma Danmarkimi fagskolini namminersortumiinnermut tapiissutitut malittarisassanik taamaattunik aalajangersagassiornissaannik peqqusineq eqqaassanngikkaanni.

### *§ 2-mut*

Inatsisartut inatsisaata akuerineqarnerata kinguninnguani Inatsisartut inatsisaata atuutilernissaa siunertaralugu Inatsisartut inatsisaat ulloq 1. januar 2026-mi atulersinneqassasoq siunnersuutigineqarpoq.

| Siunnersuut inatsimmut atuuttumut sanilliullugu                                                                                                                                                                                                                                                                                                                                                                                                                                                                                                                                                                                                                                                         |                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                              |
|---------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
| <i>Oqaasertaliunneqartut atuuttut</i>                                                                                                                                                                                                                                                                                                                                                                                                                                                                                                                                                                                                                                                                   | <i>Siunnersuut</i>                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                           |
|                                                                                                                                                                                                                                                                                                                                                                                                                                                                                                                                                                                                                                                                                                         | <p><b>§ 1</b></p> <p>1. Qulequtaata taaguutaa ima oqaasertaqalerpoq:<br/> ”Efterskolit aamma atuarfiit ilaanni najugaqarnermut aamma paarlaasseqatigiilluni nunami allamiinnermut tapiissuteqartarneq pillugit Inatsisartut inatsisaat”.</p>                                                                                                                                                                                                                                                                                                                                                                                                                                                                                                                                                                                                                                 |
| <p><b>Kapitel 5</b></p> <p>Danmarkimi efterskolernermut aamma paarlaasseqatigiittarnermut tapiissutit</p>                                                                                                                                                                                                                                                                                                                                                                                                                                                                                                                                                                                               | <p>2. Kapitali 5-mi qulequtaq imatut oqaasertalerneqassaaq:<br/> ”<i>Danmarkimi Savalimmiunilu efterskolimiinnermut, Danmarkimi fagskolini namminersortuniinnermut aamma paarlaasseqatigiinnernut tapiissuteqartarneq</i>”.</p>                                                                                                                                                                                                                                                                                                                                                                                                                                                                                                                                                                                                                                              |
| <p>§ 20. Naalakkersuisut Danmarkimi efterskolernermi aningaasartuutitut tapiisinnaapput, matumani atuartut akiliutaasa ikilisinnissaannut tapit kiisalu atuartut angalanerinit aningaasartuutit akilissallugit, tak. § 15, imm. 1 aamma 2. Tapiissutit tamarmiusut amerlassusaat ukiut tamaasa Aningaasanut Inatsimmi aalajangerneqartarput.</p> <p>Imm. 2. Naalakkersuisut Danmarkimi efterskolernernut tapiissutit tunniunneqarnissaat pillugu malittarisassanik aalajangersaassapput, matumani ilanngullugit tapiisarnissamut piumasaqaatit, tapiissutit annertussusaat, isertitat annertussusaat naapertorlugu akiliuteqartarneq, qinnuteqarnermi periusissat aamma maalaarnissamut aqutissat.”</p> | <p>3. § 20 imatut oqaasertalerneqassaaq:<br/> ” § 20. Naalakkersuisut Danmarkimi Savalimmiunilu efterskolernermi kiisalu Danmarkimi fagskolini namminersortuniinnermi aningaasartuutitut tapiissuteqarsinnaapput, tassunga ilanngullugit atuartut akiliutaasa ikilisinneqarnerinit tapit, kiisalu atuartut angalanerini aningaasartuutit akilissallugit, tak. § 15, imm. 1 aamma 2. Tapiissutit tamarmiusut amerlassusaat ukiut tamaasa Aningaasanut Inatsimmi aalajangersarneqartarput.</p> <p>Imm. 2. Danmarkimi Savalimmiunilu efterskolernermut kiisalu Danmarkimi fagskolini namminersortuniinnermut tapiissutinik tapiiffigineqarsinnaanermut akuersissutit pillugit Naalakkersuisut aalajangersaassapput, matumani tapiissutinik tiguisinnaanermut piumasaqaatit, tapiissutit annertussusissaat, isertitat naapertorlutit nalimmassaasinnaaneq, qinnuteqariaatsit</p> |

|  |                                                                                                                      |
|--|----------------------------------------------------------------------------------------------------------------------|
|  | kiisalu naammagittaalliorsinnaaneq<br>ilanngullugit.”                                                                |
|  | <p style="text-align: center;"><b>§ 2</b></p> <p>Inatsisartut inatsisaat ulloq 1. januar 2026<br/>atuutilissaaq.</p> |

Siunnersuut tusarniaavigisartakkanut ukununga ulluni 2. juni-miit 30. Juni -mut 2025-mi tusarniutigineqarpoq:

SIK

Kalaallit Sulisitsisut/Grønlands Erhverv

NUSUKA

Avannaata Kommunia

Kommune Qeqertalik

Qeqqata Kommunia

Kommuneqarfik Sermersooq

Kommune Kujalleq

Atuarfiit namminersortitat peqatigiiffiat

Efterskolit peqatigiiffiat

Maniitsup Efterskolia

Villads Villadsenip efterskolia

Taassuma saniatigut siunnersuut Naalakkersuisut tusarniaanermi nittartagaat aqqutigalugu piffissami tassani pissarsiarineqarsinnaavoq.

Tusarniaanermut piffissaliussap naanerani tusarniaanermut akissutit ukunanga tiguneqarput:

Kalaallit Sulisitsisut tusarniaanermi akissuteqarpoq, siunnersuummullu oqaaseqaateqarani.

SIK kiisalu Foreningen af Frie Fagskoler og Efterskolerne tusarniaanermi akissuteqarput taakkualu oqaaseqaataat nalinginnaasumik allanneqarput, Naalakkersuisut oqaaseqaataat *uingasumik naqinnilimmik* allanneqarlutik.

Tusarniaaneq tunngavigalugu siunnersuummi fagskolini namminersortuni najugaqarnermi ukiumut agguaqatigiissillugu akeqartitsineq pillugu oqaaseqaatit allannguuteqarput.

SIK-ip siunnersuut tapersersorpaa, aammalu oqaatigaa ilaasortaminni ilinniarsimanngitsut 50-70 %-iusut. Angajoqqaat SIK-ip isumaqatigiissutaa malillugu minnerpaamik akissarsiallit meeqqatik efterskolimut imaluunniit fagskolimut namminersortumut nassiussinnaanissaannut aningaasatigut ajornartorsiuteqarsinnaasarput. SIK-ip nuannaarutigaa ilaasortaminni meeqqanut periarfissaq pilersinneqarmat, taamaalillutik tamarmik ilinniagaqarnissamut pisariaqartinneqartunik piginnaasassanik pissarsisinnaallutik. Taamaalilluni eqimattaq taanna periarfissinneqassaaq piginnaangorsaqqinnissamut Savalimmiuni efterskolimut imaluunniit Danmarkimi fagskolini namminersortuni peqataasinnaanissamut.

*Tamanna pillugu oqaatigineqassaaq, Savalimmiuni efterskolimut imaluunniit Danmarkimi fagskolini namminersortuniinneq inuusuttunut Danmarkimi efterskolimut angalanissamik kissaateqanngitsunut periarfissatsialaasoq alla. Tamanna pingaartumik atuuppoq inuusuttunut, suliatigut suliaqarnermik imaqartumik atuartitaanissamik kissaateqartunut.*

SIK-ip aamma maluginiarpaa, piffissami ukiuni pingasuni naatsorsuinerimi angajoqqaat isertitaasa tunngavigalugit atuartut agguataarnerat takussutissiami takutinneqartumi, amerlanerpaajusut isertitakitsuneersuusut, akunnattumillu isertitaqartut ikinnerpaajusut.

SIK-p taperserpaa, inuusuttunut eqimattani isertitakinnerpaajusunit aggersut Savalimmiuni efterskolimut aammalu Danmarkimi fagskolini namminersortunit angalasinnaanissaat aningaasatigut tapersersorneqassasut, taamaalillutik siunissami pisariaqartitsineq naammassineqarsinnaaqqullugu, aammalu efterskolimeereernerup kingorna ingerlaqqiffiusumik ilinniagaqarsinnaaqqullugit.

*Tamanna pillugu oqaatigineqassaaq, Danmarkimi efterskolimiinnermut aningaasatigut tapersiissutit allannguuteqanngitsut, kisianni siunnersuutigineqarpoq taakku Savalimmiuni efterskolimiinnermut aammalu Danmarkimi fagskolini namminersortuniinnermut atuutilersinneqassasut.*

Foreningen af Frie Fagskoler og Efterskolerne inatsisissatut siunnersuut tikilluaqquaa. Peqatigiiffiup nalilerpaa, inuusuttunut ilinniarnissamut periarfissat pillugit takorluugaat naapertorlugit siunnersuut tapersersuilluartoq, aningaasatigut tapersiissutit Savalimmiuni efterskolimut aammalu Danmarkimi fagskolini namminersortunut atuutilersinneqarmata.

Tamatuma saniatigut peqatigiiffik qujassuteqarpoq suliaqarnermi paasinartumik peqataatitsisumik ingerlanneqarnera aammalu pitsaasumik oqaloqatigiinneq tunngavigalugu siunnersuut manna piareersarneqarmat.

*Tusaatissatut tiguneqarpoq.*

Foreningen af Frie Fagskoler og Efterskolerne-p oqaatigaa, fagskolini namminersortuni najugaqarnerup ukiumut nammineq akilernissaa 113.000 kr.-inik naatsorsorneqarsimasooq, immikkoortumi 3-mi pisortat aningaasatigut allaffissornikkullu kingunerisinnaasaat pillugit allassimasooq, qaffasippallaartoq. Agguaqatigiissillugu ukiumut atuarfiusumut nammineq akiliinissaaq 80.000 kr.-t missaaniippoq. Tamatuma saniatigut Namminersorlutik Oqartussat angalanermut aningaasartuutitut tapersiissuteqartarsinnaapput. Foreningen af Frie Fagskoler og Efterskolerne kaammattuivoq aningaasatigut tunngaviit allanngortinneqassasut, taamaalillutik aningaasatigut kingunerisinnaasat naatsorsorneqartut piviusunik akinik takutitsilersillugit.

*Tamanna pillugu oqaatigineqarpoq, agguaqatigiissillugu akit [www.efterskolerne.dk](http://www.efterskolerne.dk)-mi paasissutissat tunngavigalugit naatsorsorneqarsimammata, naalagaaffimmit nammineq akiliutip ikilisaataasinnaasumik tapersiissutit ilanngunneqannginneranni. Oqaaseqaat tusaatissatut tiguneqarpoq, aammalu agguaqatigiissillugu akit aningaasatigut allaffissornikkullu kingunerisinnaasai pillugit nassuiaammi allanngortinneqarsimallutik.*

Naggataatigullu Foreningen af Frie Fagskoler og Efterskolerne ilisimatitsivoq, suli ingerlaqqilluni peqatigiiffiup suliniutai nukittorsarniarlugit, atuarfiit atuartitsinissamut naleqquttumik kajumilersitsisumillu neqerooruteqartarnissaat tapersersorniarlugu, atuarfiit ineqarfiutigisuni marluusut akornanni.

*Tusaatissatut tiguneqarpoq.*